

Pickup ta bolter den awa sushi dilanti di The Mill



ORANJESTAD(AAN): -- Ayera tardi den careda di 4'or alarma grandi a ser bati despues cu a derenta informacion na central di polis cu dilanti di The Mill Resort tin un accidente basta pisa caminda un pickup a bolter y e chofer ta pega bao dje.

Ora cu e promer patruya di polis a yega eyan ta resulta cu no tin hende pega bao di auto pero polis a bin haye sinta na banda y tur muha.

Parce cu tin un auto a stroba e chofer aki cu e pickup blanco cu number A-30552



den e birada pa cual el a perde control y a bolter den e saliña.

Mirando e promer informacion cu a drenta e unidad di bombero y rescate a sali mesora pero na yega no mester a bay den accion.

E ambulans si a presenta y a hiba e pashent hospital pa asina e haya tratamento medixco.

E departamento di trafico a bin na e lugar di accident y a haci investigacion necesario y mirando cu e pickup no ta stroba trafico el a keda gebolter den e lagoen.

John F. Kennedy School definitivamente pasa pa polis Polis, D.O.W. y Domeinbeheer di bishita ayera na e futuro warda



ORANJESTAD(AAN): -- Ayera mainta 9'or despues di un palabracion a topa otro na John F Kennedy School algun hefe di polis, D.O.W. y tambe Domein Beheer pa asina pa promer biaha, mira e estado di e scol di banda di paden ya cu esaki a ser pasa di parti di gobierno pa polis.

Presente na e scol **DIARIO** a combersa cu Comisario sr. Hugo Kock y el a bisa cu nan a bay cana eyan ya cu nan kier mira promer y despues di parti di polis sinta na mesa cu algun hefe di cada seccion pa asina traha un plan unanimamente unda cada departamento tambe lo duna nan opinion y pa despues diseña e edificio manera cu nan kier.

Tin planes pa asina cu e

edificio keda cla no unicamente polis ta ubica mas hopi departamento di polis na e scol pero tambe lo trata di ubica e scol di polis y tambe un scol di deporte den e lugar aki caminda tur cos lo keda den un solo edificio.

Tin pensa di bin tambe cu exigencianan di mas moderno manera caminda cu e lugarnan cu e celnan ta lo traha un lugar caminda e auto ta drenta y ta keda completamente sera di tal forma cu ta mas sigur pa esnan cu ta transporta preso y tambe pa e presonan mes principalmente ora cu ta trata di presonan peligroso y hopi busca.

Pa loke ta e plan aki mes sr Hugo Kock a bisa cu mirando e estado di edificio aki y mirando tambe e situacion fi-

nanciero di gobierno ta pensa cu e lo por dura un cinco aña mas of menos pasobra ta segun cierto edificio cu polis ta huur y nan contract caba nan lo bay over eyden.

Tin edificio segun sr. Hugo Kock cu nan no por kibra contract pasobra cu e doñonan a inverti masha hopi placa aden y nan ta mara na e contract.

Pa loke ta e opinion mes di Hugo Kock riba e edificio aki e ta bisa cu e ta hopi bon y tambe e ta centrico y no solamente esey, e ta tambe un lugar cu salida pa tur banda di tal forma cu e patruyanan por sali bay den ki direccion cu nan kier y tambe e ta facil pa esnan cu kier bin warda di polis nan por hacie facilmente ya cu di tur banda nan por yega serca polis.